

Kalaallit Nunaanni eqqartuussisarnermik inatsisip
allanngortinneqarnera pillugu inatsit
(Inuit sakkutuujunngitsut pillugit eqqartuussivimmi suliat Nunatta
Eqqartuussisuuneqarfianut innersuunneqarnerat)

§ 1

Inatsisaareersut allannguutaanik eqikkarlugit nalunaarut nr. 1186, 18. september 2023-imeersoq malillugu Kalaallit Nunaanni eqqartuussisarnermik inatsimmi allannguutit tulliuttut suliarineqassapput:

1. § 7, *imm. 2-mi oqaaseqatigiinni siullerni*, ”suliarinneqqaarfiusutut aalajangiiffigisimasai” kingorna ”imaluunniit § 57 a malillugu innersuunneqarsimasut,” ilanngunneqassaaq.

2. § 7, *imm. 2-mi oqaaseqatigiit siulliit kingorna oqaaseqatigiittut nutaatut una*: ”Pisuni, § 57 a, *imm. 5-imi taaneqartuni tamanna aamma atuuppoq.*” ilanngunneqassaaq.

3. § 57-ip kingorna ilanngunneqassaaq:

”§ 57 a. Suliaq pingaarluinnartutut pissuseqarpat aamma inatsisunik atuinermut aamma eqqartuussisutigoortitsinermut suliassaqarfimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussatut nalinginnaasumik pingaassuseqarpat, § 54, nr. 1 malillugu Nunatsinni Eqqartuussiviup akuusumit noqqaassuteqarfigineqarnermigut inuit sakkutuujunngitsut pillugit eqqartuussivimmi suliaq Nunatta Eqqartuussisuuneqarfianut suliarisassanngorlugu innersuussinnaavaa.

Imm. 2. Suliaq najukkami eqqartuussivimmi suliarineqarnissaa imaluunniit Nunatsinni Eqqartuussivimmi suliarineqarnissaa akuusut isumaqatigiissutigisimappassuk, akuusut marluullutik noqqaassuteqarnerisigut, innersuussineq taamaallaat pisinnaavoq.

Imm. 3. § 233, *imm. 1* malillugu piareersaanerup naammassinnginnerani innersuussinissaq pillugu noqqaassut saqqummiunneqassaaq.

Imm. 4. Suliap innersuunneqarnissaa imaluunniit innersuunneqannginnissaa pillugu aalajangiineq, aalajangiinikkut, tunngavilersorneqartussakkut, aalajangerneqassaaq.

Imm. 5. Imm. 1-imi innersuussinissamut piumasqaatit naammassineqarsimanersut, Nunatta Eqqartuussisuuneqarfiata nammineq suliniuteqarnermigut nakkutigissavaa. Piumasqaatit naammassineqarsimanngippata, eqqartuussisuuneqarfiup suliap sularinneqqaarfiusutut sularineqarnissaa itigartissavaa aamma suliaq Nunatsinni Eqqartuussivimmut sularieqqitassanngorlugu nassitissallugu. Eqqartuussisuuneqarfiup aalajangiinera, aalajangiinikkut, tunngavilersorneqartukkut, aalajangerneqassaaq.”

4. § 59-imi imm. 2-tut ilanngunneqassaaq:

”*Imm. 2. § 57 a-p* malitsigisaanik suliat Nunatsinni Eqqartuussivimmit Nunatta Eqqartuussisuuneqarfianut innersuunneqarsimasut, Nunatta Eqqartuussisuuneqarfiata sularinneqqaarfiusutut aammattaq sularissavai.”

5. § 60-imi imm. 2-tut ilanngunneqassaaq:

”*Imm. 2.* Suliat Nunatta Eqqartuussisuuneqarfianit sularinneqqaarfiusutut aalajangiiffigineqarsimasut, aamma inatsimmi matumani malittarisassat malillugit aappasaanersumik sularinniffiusussatut Eqqartuussiviit Qullersaannut saqqummiunneqarsinnaasut, Eqqartuussiviit Qullersaata aammattaq sularisarpai.”

6. § 515, imm. 1-imi oqaaseqatigiinni siullerni, ”Kalaallit Nunaata Eqqartuussisuuneqarfianit” kingorna ilanngunneqassaaq: ”aappassaaneersumik sularinniffiusussatut”.

7. § 515, imm. 2-mi oqaaseqatigiinni siullerni, ”sapaatit akunneri arfineq pingasut” ima allanngortinneqassapput: ”sapaatit akunneri 4”.

8. § 515-ip kingorna ilanngunneqassaaq:

”**§ 515 a.** Eqqartuussutit, Nunatta Eqqartuussisuuneqarfianit sularinneqqaarfiusutut eqqartuussutit nalunaarutigineqarsimasut, akuusumit, eqqartuussutikkut piumasqaatigisaminik tamakkiisumik taparserneqanngitsumit, Eqqartuussiviit Qullersaannut naammagittaalliuutigineqarsinnaapput.”

9. § 516-imi ”suliarineqarneranut” kingorna ilanngunneqassaaq:
”aallartinneqarneranullu”.

10. § 526, imm. 1-imi, oqaaseqatigiit pingajuattut ilanngunneqassaaq:
”Itigartitsineq pillugu aalajangiineq, Nunatta Eqqartuussisuuneqarfianit § 57 a, imm. 5 malillugu aalajangerneqartoq, Ingerlatitseqqinnissamik aalajangiisartut akuersiteqqaarnagit, Eqqartuussiviit Qullersaannut aalajangeqqitassanngortinneqarsinnaavoq.”

11. § 527-imi ”suliarineqarneranut” kingorna ilanngunneqassaaq:
”aallartinneqarneranullu”.

12. § 527-imi oqaaseqatigiit aappaapput ilanngunneqassaaq:
”Taamaattoq aalajangeqqitassanngortitsinermi piffissaliusseq sapaatit akunnerinik 4-nik sivilissuseqarpoq.”

§ 2

Imm. 1. Inatsit ulloq 1. juli 2024 atuutilissaaq.

Imm. 2. Inatsisip atuutilinnginneranni eqqartuussutitut nalunaarutigineqarsimasunut inatsisip § 1, nr. 7 atuutissanngilaq. Eqqartuussutitut taamaattunut maannamut malittarisassat atuuttut atuutissapput.